

# BULGARIEN 2015

## WUCHERÜCKBLICK (17. - 24.6.)

### Mittwuch

So schnäll isch doch es Jahr vergange  
eigentlich sind mir erscht hei gange  
es isch schön simmer wieder da  
es fühlt sich fascht wie hei cho aa

### Dunnschtig

es isch ä chli komisch, das Bulgarie Läbe  
mer erwartet doch Sunne - nid de ganz Tag Räge  
scho wieder chömmmer nid ufs Hotel Dach  
de bulgarisch Petrus schint mir ä chli schwach

Es isch nid eifach, eus i de Poolbar en Tanz z'lehre  
sisch luut und eng, mer chan sich fascht nid chere  
aber du machsch'es wieder souverän  
und genau darum händ mir dich gärn

aber au will du us Schwierigkeite s'Bescht chasch mache  
will du au chasch über dich sälber lache  
will du immer dis Beschti gisch  
und will din humor so aaschteckend isch

Scho am Dunschtig hämmer es Resultat  
dänn am Abig liged scho vier Stepsheets parat  
vier Tänz hämmer im Prinzip scho glehrt  
na ja - ab und zue lauft na öpis verchehrt

### Friitig

Öpis Verchehrts chas au bim Profi gä  
doch mues mer das eifach locker näh  
d'Hälfti vom „Full-turn“ isch eifach verschwunde  
zum Glück häsch en am Abig dänn wieder gfunde

### Samschtig

Am Samschtig schynt d' Sunne. Und ihr händ vorus tänkt  
und es wunderbars Sunne Sägel ufghänkt  
"Down to the River" isch grad dopplet heiss  
eus raucht de Chopf und s'flüsst de Schweiss

Bisher isch hinter dem Wald en Autobahn gsy  
doch isch das sit am Samschtig verby  
zum eus hälfe wie mer "uf 3 Uhr zum Meer drehe" macht  
häscht du churzerhand da hine es Meer erschafft

Die Jeep Fahrt isch gsy au wieder geil  
scho nach 5 Minute bruched mer s'Abschleppseil  
wo ner wieder lauft und uf de Hügel isch kroche  
isch bim zweite Jeep de Motor abgsoffe

es isch a wunderschöni gschüttletli Fahrt  
bim Halt isch scho de Schnaps parat  
die bulgarisch Wurst und die feine Melone  
so ne Jeep Fahrt tuet sich eifach lohne

Ei Gruppe isch am bulgarische Aabig go diniere  
am Meer entlang chöni mer schynt's STRANDIERE  
Für die ander Gruppe hät d'Helene Musig la laufe  
Und ich bin vorher no go es paar Röckli chaufe

### Sunntig

mit "Dog River Blues" fangt de Sunntig aa  
und dänn chunt de "Only Lonely" dra  
am Aabig müend mer s'Tanze la ga  
defür han ich Zyt für das Gedichtli gha

### Mäntig

Am Mäntig häsch eus uf Sozopol bracht  
Mir händ vill vo dir glehrt und vill mit dir glacht  
Zwar isch de Schlossherr nid erschiene wie versproche  
Er hät sich wohl i eim vo sine Türm verchroche

I eusere churze Wuche hät doch na vill Platz  
und so vill macht im Hindergrund de Schatz  
Es isch so schön, dass es eu Zwei git  
dank eu gnüssed mir eusi Feriezyt

So - das wär de Wucherückblick gsy  
tanzed hämer au no, z.B. "Greater than me"  
"Down to the River" hani scho erwähnt  
"Love's Highway" i de Ufzellig no fählt

Dänn hämmer no de "Smiling Song" und "Somewhere in my Car"  
au "Modern Romance" tönt wunderbar  
"Best part of the day" isch anschienend d'Nacht  
mit "Men don t change" händ's no en passende Titel gmacht

Au „Don't let me down" hämmer na ine biiged  
s'isch chum aaznäh dass alles dine blibet  
au wänn einigi Tänz tüend i de Vergässeheit versänke  
de Strick isch weg wo du eus häsch welle ufhänke

Im Prinzip gäbs no vill über die Wuche z'säge  
vom Tanze, vo de Sunne und au echli vom Räge  
au vo vergässne 8 Counts wänn zeigsch öpis Neus  
doch känned mer de Trick scho, de zieht nümme bi eus

es isch soooo schön gsy, doch jetzt müemmer hei  
und Ihr händ Freud sind Ihr wieder allei  
danke villmal für alles, es isch wieder gsy en Hit  
und natürli chömed mer s'nächtscht Jahr wieder mit.